

Šta je olimpizam danas — na to bi pitanje dobili vrlo mnogo raznih odgovora, iz prostog razloga što opće usvojenih definicija „olimpizam danas“ — u savremenim uslovima naprosto nema. Osnovna karakteristika olimpizma danas jeste da svi mi vučemo „prtljag“ olimpijskih principa iz prošlosti i mučimo se da između tih principa i stvarnosti suvremenog društva nađemo kompromis. Stalno se pozivamo i podsjećamo na klasične principe kao:

- na olimpijskim takmičenjima važno je učestvovati a ne samo pobijediti,
- svi takmičari su ravnopravni bez obzira na razlike u rasi, vjeri ili političkoj pripadnosti,
- sudjelovati mogu samo amateri a ne i profesionalci (ili poluprofesionalci),
- olimpijada je natjecanje pojedinaca a ne nacija,
- nedopustivo je mišljenje politike u sport itd.

Kroz prizmu tih i takvih principa odvijaju se i sagledavaju događaji na olimpijadama, regionalnim takmičenjima (pod patronatstvom MOK) na te principe kad urebba pozivamo se i na raznim ostalim takmičenjima. Krajnji ishodi konfrontacije tih principa i suvremene stvarnosti na raspravama u MOK a pogotovo u internacionalnim federacijama, sve-više pretežu u korist ovog drugog faktora. Pa, ipak sporo se mijenjaju i moderniziraju pravila međunarodnih organizacija a kamoli da se izvrši definicija „olimpizma danas“ kao pokreta sa svojom suvremenom ideologijom.

Ja lično kao predstavnik Jugoslavije u MOK bio bih sretan da barem mi u našoj zemlji, na bazi naših sagledavanja, pokušamo doći do takve definicije. Pošto sam kao prvi prozvan, ja mogu samo da oslikam pojedine sastavne dijelove pokreta i njegovih manifestacija, da oslikam razne situacije u kojima sve više dolazi do konflikta između starog i novog i da iz takve analize — slijedeći logiku razvoja društva — dodemo i do suvremene definicije.

OLIMPIJSKE IGRE

Olimpijske igre postaju sve masovnije po broju učesnika sa svih kontinenata, sve bogatije po objektima specijalno građenim za tu svrhu, sa sve većim brojem posjetilaca i sa enormnim brojem onih koji ih prate preko ekrana i kroz štampu. Gdje je granica tome konstantnom rastu teško je danas reći. Vrše se ozbiljne revizije programa, no, bez obzira, kako će se igre u budućnosti transformirati, one će uvijek imati svoju posebnu aureolu, poseban nimbus. Za razliku od svjetskih prvenstava u pojedinim sportovima, gdje se postižu i bolji rezultati, što je i logično, ipak sudjelovanje na Olimpijskim igrama i postignuti plasman ostaju posebno dragi sportistima. Ipak je to zajednički sastanak sportista i svih sportskih grana, zajednički život u olimpijskom selu, dnevni kontakti, upoznavanje i sklapanje prijateljstva, ipak je to revija cjelokupne fizičke kulture, revija sporta s kojim pojedine nacije nastupaju. Olimpijske igre su takmičenje ali i svečanost.

Bez obzira na postignute rezultate Olimpijske igre su redovite etape razvoja sporta u svijetu. One najdirektnije utječu na porast masovnosti a indirektno i na kvalitetu. I što je naročito uočljivo u zadnje vrijeme one daju snažne impulse za razvoj sporta u zemljama u razvoju, za makar izolirane prodore iz tih zemalja u sam svjetski vrh.